

PEKELILING PENTADBIRAN BIL. 10/2005

**BAYARAN ELAUN TRENGKAS DUA BAHASA KEPADA PEMBANTU TADBIR
(KESETIAUSAHAAN) DI KOLEJ UNIVERSITI TEKNIKAL KEBANGSAAN
MALAYSIA**

1.0 TUJUAN

Pekeliling ini bertujuan untuk memaklumkan keputusan Universiti berhubung syarat-syarat bayaran Elaun Trengkas Dua Bahasa ("ETDB") kepada Pembantu Tadbir (Kesetiausahaan) di Kolej Universiti Teknikal Kebangsaan Malaysia ("Universiti").

2.0 LATARBELAKANG

2.1 Melalui Pekeliling Perkhidmatan Bil. 7/1994 ("PP 7/1994"), Kerajaan telah memutuskan untuk membayar ETDB kepada Pembantu Tadbir (Kesetiausahaan) sebagai insentif dan galakan kerana melaksanakan tugas-tugas dengan lebih efisien berdasarkan pengetahuan dan kemahiran mengambil trengkas dan menaip salinan trengkas di dalam Bahasa Inggeris.

2.2 Pembantu Tadbir (Kesetiausahaan) yang telah lulus peperiksaan trengkas Bahasa Inggeris layak dibayar ETDB seperti berikut:-

KEDERASAN	ELAUN SEBULAN
a. Mengambil trengkas sederhana 80 perkataan seminit (p.s.m) dan menaip salinan trengkas sederhana 20 p.s.m	RM85.00
b. Mengambil trengkas sederhana 100 p.s.m dan menaip salinan trengkas sederhana 25 p.s.m	RM100.00

3.0 KEPUTUSAN MESYUARAT MAJLIS EKSEKUTIF BIL. 25/2004 PADA 11 MAC 2004

- 3.1 Di dalam Mesyuarat Majlis Eksekutif Bil. 4/2004 yang telah bersidang pada 11 Mac 2004 Universiti telah membuat keputusan untuk menerima pakai PP 7/1994 dan Pembantu Tadbir (Kesetiausahaan) boleh dibayar ETDB dengan syarat Ketua Jabatan berpuashati dengan kecekapan Pembantu Tadbir (Kesetiausahaan) berkenaan dalam mengambil Trengkas dan menaip salinan Trengkas dalam Bahasa Inggeris mengikut kederasan yang telah ditetapkan.
- 3.2 Ketetapan yang mensyaratkan kelulusan peperiksaan trengkas Bahasa Inggeris ini dibuat berdasarkan semangat ("spirit") PP 7/1994 di mana ETDB bukan satu elaun yang bersifat kekal atau layak dibayar setiap bulan tetapi sebaliknya, kelulusan peperiksaan Bahasa Inggeris merupakan pra-syarat bagi pembayaran ETDB. Ketetapan ini juga adalah bersesuaian dengan konsep pengurusan sumber manusia berteraskan kompetensi atau penguasaan kemahiran yang telah diperkenalkan melalui pelaksanaan Sistem Saraan Malaysia.

4.0 PELAKSANAAN

- 4.1 Bermula dari 1 Januari 2006, syarat kelulusan peperiksaan Trengkas Bahasa Inggeris akan dikuatkuasakan sepenuhnya bagi menentukan pembayaran ETDB kepada Pembantu Tadbir (Kesetiausahaan). Peperiksaan Trengkas Bahasa Inggeris ini akan diadakan pada tarikh, tempat dan mengikut kekerapan yang akan ditentukan kelak. Semua Pembantu Tadbir (Kesetiausahaan) sama ada yang dilantik secara tetap atau sementara adalah digalakkan untuk mengambil peperiksaan ini.

- 4.2 Bagi tahun 2005 ini, semua Pembantu Tadbir (Kesetiausahaan) yang sedang berkhidmat sama ada secara lantikan sementara atau tetap, akan dibayar ETDB setiap bulan di sepanjang tahun 2005 sahaja **TERTAKLUK** kepada penyerahan dokumen berupa Transkrip Penuh atau lain-lain bukti yang boleh diterima oleh Pejabat Pendaftar mengikut budi bicaranya yang mutlak bahawa mereka telahpun lulus peperiksaan Trengkas Bahasa Inggeris pada kederasan yang menepati syarat-syarat PP 7/1994 ketika mengikuti pengajian peringkat Diploma Sains Kesetiausahaan sama ada di Universiti Teknologi MARA atau di Politeknik Kementerian Pendidikan.
- 4.3 Selanjutnya, peperiksaan Trengkas Bahasa Inggeris ini akan diadakan pada setiap tahun bermula pada tahun 2005 ini yang mana keputusannya nanti akan menentukan sama ada bayaran ETDB boleh diteruskan kepada Pembantu Tadbir (Kesetiausahaan) berkenaan untuk tahun yang berikutnya. Mana-mana Pembantu Tadbir (Kesetiausahaan) yang tidak menduduki peperiksaan tersebut di atas apa-apa sebab sekalipun akan secara automatik dianggap gagal dan pembayaran ETDB akan diberhentikan untuk tahun yang berikutnya.
- 4.4 Walau apapun yang dinyatakan di Perenggan 4.1, 4.2 dan 4.3 diatas, **pada bila-bila masa** jika seseorang Ketua Jabatan mendapati bahawa mutu kecekapan dalam mengambil dan menaip Trengkas bagi seseorang Pembantu Tadbir (Kesetiausahaan) yang sedang menerima mana-mana elaun yang disebut di dalam PP 7/1994 telah merosot, maka Pembantu Tadbir (Kesetiausahaan) yang berkenaan boleh diarahkan oleh Ketua Jabatannya untuk mengambil peperiksaan trengkas dan menaip. Sekiranya Pembantu Tadbir (Kesetiausahaan) berkenaan gagal mencapai tahap kecekapan yang diperlukan, maka elaun-elaun yang beliau layak akan diberhentikan. Elaun tersebut tidak akan diperbaharui sehingga Pembantu Tadbir (Kesetiausahaan) itu telah lulus peperiksaan yang berkenaan.

4.5 Bagi Pembantu Tadbir (Kesetiausahaan) yang sedang menjawat jawatan berkenaan berdasarkan kelayakan Sijil Pelajaran Malaysia dan lulus ujian masuk mengambil trengkas sepertimana yang ditetapkan oleh Skim Perkhidmatan Pembantu Tadbir (Kesetiausahaan), ETDB boleh dibayar di sepanjang tahun 2005 ini dengan syarat Perenggan 4.2 di atas dipatuhi iaitu dengan menunjukkan bukti yang boleh diterima berhubung kelulusan peperiksaan Trengkas Bahasa Inggeris. Bagi pembayaran ETDB untuk tahun-tahun yang berikutnya, Pembantu Tadbir (Kesetiausahaan) tersebut diwajibkan lulus peperiksaan Trengkas Bahasa Inggeris sepertimana di Perenggan 4.3 diatas.

5.0 TARIKH KUATKUASA

Pekeliling ini berkuatkuasa mulai tarikh ia dikeluarkan.

Sekian, dimaklumkan.

“KOMPETENSI TERAS KEGEMILANGAN”

Saya yang menurut perintah

HASAN BIN SIRUN

Pendaftar

sk Y.Bhg. Datuk Rektor
 Y.Bhg. Timbalan Rektor (Akademik)
 Y.Bhg. Datuk Timbalan Rektor (Pembangunan & Perancangan Korporat)
 Pegawai-pegawai Kanan / Dekan